

TITO

Kukue Ko Paulo Lɛwɔni Útə Tito

¹ Mɔ, Paulo, wə ni Onanto eto usumunyə ku Yesu Kristo eto ɔtɔnkpe, mɔ ni futsyə nɛ fə kukue komfo bɔwɔni. Onanto dɪlɛkə mɛ nya ɔtsyese mɛ nkə nsu nwunsəko wə betidi ba úlɛkə útsyə eto bafobanɔ lə nyenko mə lə bafɔ Ditiki Sɛɛ nəmə bánɔ lə bo bafokanɔsu əsuə. ² Bofokanɔsu komfo dɪtə bɔnlɛ kusu bobɛ itə nkɔrə manlo bo əsuə bófo bóno nɛ. Nya Onanto wə ləmbɔwɛ bo kosatee, wə leteyi ditiki nəmfo útsyə fɛ úyifo kawunsɪə. ³ Wə dɪlɛkə nkɔrə manlo eto Ditiki Sɛɛ nəmfo ɔtɛ bo eyɛ lə wə ditiki nə minɛ mi bɔtɛyi lə lefe nə wə kosate leteyi utsyə əsuə. Nyamfo ni lesa nə ufi okpe mɛ lə ani nya mimfi minɛ letsya bobɛ kətə betidi. Boanto Onanto wə ni bo Ofomfokətə, wə leteyi mɛ nkə mbe ni letsya nɛ.

⁴ Mɔ olala Tito, nɛ kukue komfo bɔwɔni kətə fə itsyise eyifo mɔ ubi tinti lə bofokanɔ bɔni bo əsuə bonkpe eso. Nya nɛ Boanto Onanto ku Kristo Yesu wə ni bo Ofomfokətə lekpakpa bə ɔlɛ fə ku lefonə ku diyuə əsuə, nya lə utə fə diyuəsə.

Paulo Itə Tito Keyifo Katsyuə Lə Kreta.

⁵ Nyani fə ntsyə lə Kreta ku nsusu bə lə alɔ lesa saa nə dɪbu bɔlɔkətsyə ətsyə. Nya lə umə saa, ləkə batɔnkɔtɔnko ba lofo buɪnyə lə bafokanɔfo eto kɛnyɛ fɛ kase mɪntɛyi fə miə yifo. ⁶ Fɛ bafokanɔfo eto batɔnkɔtɔnkoo, yanlɛ bə etiki

bua saa ke læ mæ əsuə. Nya ele bæ uyifo utidi wə mfi kusia kɔni hã. Nya wə bebi tsya eyifo bebi ba léfo banɔ keklege, nya beenyifo mba ditidi ato, nya beebu mæ antomə. ⁷ Fe bafokanɔfo eto ɔtɔnkotɔnko wə laabe Onanto eto keyifoo, yanle bæ bənyə nye befi etiki bua saa læ wə nye ukabesə əsuə kato nye kafo kanyi wə mləmləmlə. Nya yanle bæ udui utekpe, nya yanle bæ okakpɔ ekiti keklege nye ukasesə ənəmi tsya læ atabi əsuə. ⁸ Ele bæ ofo bafɔ bofo, keyifo kafokpe nya woala asa sɛɛ nya woalɛ wə əsuə ola. Nya ele bæ uyifo utidi wə nkpe ditsyəbi sɛɛ, nya uyifo kɛnkɛ læ læwɔnɔ əsuə, nya wooyɛ læ kɔfi əsuə. ⁹ Ele bæ uyifo nwə nɛ Ditiki Sɛɛ nəmə læ kɔni keklege fe kase bɔfokanɔ eto kusu leté. Nya kusu komfo əsuə hã ele bæ wuukayɛ bæ læ okpe betidi bamba tsya ute læ əsuə, nya læ ofo mba laataka kənyə læ Ditiki Sɛɛ nəmfo əsuə eto botakebu buləkə kate mæ.

¹⁰ Itsyise betidi kpə kpe ba nɛ betidi bɔwɛ nya bətaka bənyə læ ditiki nəmə əsuə ku mæ ebukisa buyifo. Nya mba nso asa nyamfo kenke buyifo, mæ ni Yudafɔ eto bafokanɔfo. ¹¹ Efe bæ taka ənyə læ mæ asa nyamfo eto okle eto bote əsuə, itsyise asa nyamfo ənə bulə kakpe læ diyo eto betidi eto bɔfokanɔ əsuə. Nya se ini atabi asa buabote eto bateasa bamfo lænyə ketsyiko le nya əsuə esoo, nyaso banɛ asa bua nyamfo bote nɛ. ¹² Nya Kreta eto utidi ɔni wə ni mæ unyɛləkətidi letɛyi nkə, “Kretafɔ, bidia baateyi mi lefe saa nya beeyifo mba laabiasə asa kakpe fe bebuki, nya bedikpū beni nya bankpe sɛflɔ tsya.” ¹³ Asa nya unyɛləkətidi əmfo letɛyi eyifo ɔnukualɛ. Nyaso

bikə mə ato bə lə baye ditsyəbi bua nəmfo bote itə lə mə bofokanɔ lə buyifo sitinti. ¹⁴ Nyamfo luutə bə bələkə mə ato betsyiko lə Yudafo eto etikitsyuentsyue ku betidi ba eto asatete nnya lanye lə ɔnukuale eto Ditiki Sɛɛ nəmə əsuə nɛ.

¹⁵ Betidi ba kenke diyifo mə əsuə kɛnkɛ, mə eyifosa tsya eyifo kɛnkɛ. Fɛɛ lə betidi ba diyifo mə əsuə betidi bua nya bámfo banɔ ɔfloɔ, kulesa menyifo kɛnkɛ. Mə esibubu ku mə ketu eyi ku asa bua, lə nyaso bəəmbofo nya ni asɛ lekpo butsyə ketsyiko lə abua əsuə. ¹⁶ Mə kosate aatɛyi bə beebu Onanto, fɛɛ mə eyifosa mante nko. Beyifo betidi ba laabiasə mə əsuə nya beembu kulesa nya bəənyə bətə lesa sɛɛ saa buyifo.

2

Te Bofokanɔ Eto Asa Nnya Nye Lə ɔnukualesu Əsuə.

¹ Fɛ fəə, te asa nnya nye lə bofokanɔ eto kusu sɛɛ əsuə. ² Te basani eto beninə kenke bə ele bə bebu mə əsuə, lə bakafo mə lekɔle ani boso ku bətə ənə lefe saa. Nya lə balɛ mə əsuə kukɔnɔ, balɛ mə bofokanɔ kɔni kekkeke, lə bala mə bətsyuə, nya lə bakpe nkɛale ku lə bakɛ dibusə tsya. ³ Nko ke ini itə besioninə tsya nɛ, te mə kase ele bə bəsiə nkpə bo dinyə itə besio ba diyifo kɛnkɛ. Yanle bə bakakpadi betidi aye bua. Nya yanle bə bənə nte bəkpə tsya. Bomu ele bə bate betidi ditsyəbi sɛɛ. ⁴ Nya ele bə baté besio bitɛ ba nsi bese kase ele bə bala mə bese ku mə bebi tsya. ⁵ Nya ele bə bate mɛ kase boole mə əsuə ola, nya ele bə bəsiə nkpə bo diyifo kɛnkɛ, nya lə beyifo bəsiə ba laale mə bese ola kukɔnɔ,

mba leebu mə bese. Nyamfo luutə bə kuutsyuə saa əmbətəyi kulesa bua saa iitsyi lə Ditiki Sɛɛ nə ditsyi lə Onanto ɔflo əsuə nɛ.

⁶ Nko ke ɛyɛ lə kusu komfo əsuə ele bə lə ayenko bakosobi bamə tsya lə akpe mə nkɛale lə kase ele bə balɛ mə əsuə ola. ⁷ Lə asa nyamfo kenke eto kamaa, ele bə yifo fə əsuə futsyɛ eto ditsyɛbi ele bə utidi saa be lə okase utsyiko. Nya lə ɛnyə kekkele lə akate asa ku ɔnukuale. ⁸ Be kukɔɔ lə ekedi betidi etiki ku lə kusu sɛɛ əsuə itə bə həmbunyə kabua saa itsyi lə fə əsuə, nya luutə bə fə baló tsya əmbətəyi kabua saa lə bo əsuə, bomu lə kofani lə kɔlɛ mə.

⁹ Ele bə ndomufɔ bokosə mə əsuə kasɔ bətə mə banamute. Nya ele bə mə eyifosa kpe mə banamute disuəyuə lə lesa saa əsuə. Nya yanle bə bənənkɔ mə etiki. ¹⁰ Yanle bə beyu mə tsya, bomu ele bə baté mə bənkə betidi sɛɛ beni, nya beeyifo asa lə kusu əsuə kətə mə. Nyamfo luutə buunyə bətsyɛ lekpo bə bo asa nnya boate iitsyi lə Boanto Onanto wə ni bo Ofomfokətə əsuə, eyifo asa sɛɛ.

¹¹ Itsyise Onanto ələkə wə lefonə onkpe óte bo, bə kawunsiə eto betidi kenke nyə diləkə. ¹² Onanto eto kafeɛkpe kamə lɛ bo bote nkə, buləkə bo ato butsyiko lə nkpə bua busiə ku kawunsiə eto asa bimba kama butəkəko əsuə. Nyaso ele bə bɔlɛ bo əsuə kukɔɔ, nya lə busiə nkpə sɛɛ, lə buyifo əsuə kenke lə kawunsiə kamfo əsuə ¹³ Kusu komfo buufi bukabe sɛtɔ itə diyi kplɛ nə əsuə búfi bo kusubebe bütəkə nɛ. Diyi nəmfo ni diyi nə əsuə bo Onanto ɔkplenyə, bo Ofomfokətə Yesu Kristo eto diyənde lɔɔɔ

utsyuə saa nyə. ¹⁴ Úfi wə əsuə útə lə bo disi, bə lə uləkə bo utsyiko lə bo abua saa əsuə lə bofiani betidi kənke ba ni wə kosate eto bale, nyaso bíala bə biekeyifo kasεε hā nε.

¹⁵ Te asa nyamfo ku əsuəale nya Onanto dítə fə, nya lə akpe nkeale betidi ba kənke laano fə Ditiki Σεε nəmə keklege, nya lə ənyənki akpe mba lanle bəye lə kusu əsuə tsya. Nyaso məntə kuutsyuə saa kusu lə unyə fə olosə.

3

Bikəyifo Kasεε Ka Looboko Kutəkə Itə Betidi Ba Ta.

¹ Klomasə mə lə məmble bakloma lə babokosə əsuə kasə kətə mə batənkotənkə ku aba lə bətsyue mə ditiki koto, nya lə bekeyifo kasεε lə kusu saa əsuə. ² Teyi mə fənkə bankatəyi betidi eto kabua. Bomu beyifo sehə ku utsyuə saa lə bəsiə lə diyuə əsuə ku utsyuə saa. Nya lə bekebu utidi saa lə kusu saa əsuə.

³ Fεε bo əmə tsya ébuyifo ebukisa bunyə ku ato titli, nya bóta bubu kə əmə. Nya əsuə eto sinə eto abua yifoyifo butəkəko tsya diyi bo əsuə kə. Nya búfi bo lefe bítə disialeiyifoyifo, asabuyifo ku kənəminse, nya betidi díkisi bo nya bo tsya díkisi mə. ⁴ Fεε lə lefe nə Boanto Onanto, bo Ofomfokətə, dílakə wə kəfoekpe ku lelabi óte boo, ⁵ ófo bo lə nkpə. Inni lə bo kasεε ka búyifo eso, bomu eyε lə Onanto lə wə kosate eto kaminsənyənyə əsuə, itsyise útə nkə wə Ləwəno bə didufə lə bo əsuə. Ləwəno nəmfo esi dítə besinkli bále bo nya dítə bo nkpə fəfə, nya díflə bo itə bə buyifo kənke. ⁶ Onanto efi wə Ləwəno

útə bo kpə eyɛ lə bo Ofomfokətə Yesu Kristo əsuə. ⁷ Nya eyɛ lə wə lefonə esoo, bonko wə eto nti əbə bələkɛ itə eso bontsya ditiki əbə búnyə nkpə manlo bo bɔnlɛ kusu bobɛ. ⁸ Ditiki nəmfo eyifo ɔnukualɛ.

Nya nla miə lə afo nya kekleke. Nya betidi ba díkafo Onanto banɔɔ, ele bə befi mə lefe bətə asa sɛɛ buyifo nya looboko kutəkə itə betidi ba kenke.

⁹ Məənnə etiki ku utidi lə asa bimba əsuə. Mambiasə lefe lə betidi eto ketsyikɔ bokla kate əsuə, məndiə kədiə lə efi Mose eto afi eto etiki eyifo kənə eto etiki. Asa nyamfo kenke əmbə kutəkə saa. ¹⁰ Kə ato utidi wə laakpe ntisensəsensə lə bafokanɔfɔ nti sinuə. Lə nnya kamaa, yani wə. ¹¹ Eyi fə utidi əmfo eto oklee, lebuə edi wə əsuə nya wə asa buayifoyifo əələkə wə kate, nya ókalo wə əsuə dikpi.

Etiki Fɛfɛ Ku Nkla.

¹² Lə ntsyese fə Artema nye Tihikoo, yɛ kusu saa əsuə lə əbə ənyə mɛ lə Nikopoli. Itsyise mfó mimfi nsusu miə mɔɔkɛ lə lɛyɔ lefe nɛ.

¹³ Kplatsya lə ayɛ kusu saa lə awunsəko Zena wə ni afi eto ukuenta ku Apolo bə lə bəmuə əsuə itə mə kusu komə busu. Nya laabe fə bakɛ lesa saa nə baahiã. ¹⁴ Ele bə mba díkafo baanɔ kasé kase boofi mə lefe kenke bətə asasyifoyifo nya looboko kutəkə itə mə. Nya kamaa, ele bə bafɔ betidi bamba tsya bɔwunsəko lə bayɛ aflɔsa.

¹⁵ Bayimi ba kenke nkpe mɛ lə ɔfɔ mfo bə bəəsiəsə fə. Fintsya siəsə bayimi mba díkafo baanɔ ba nkpe mfó ətə bo.

Onanto lə ɔlɛ mimblɛ kenke lə wə lefonə əsuə.

**Onanto eto kakle fɔfɔ; Sɛkpɛle
Sekpele: Onanto eto kakle fɔfɔ; Sɛkpɛle New
Testament**

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 30 Sep 2022 from source
files dated 13 Jul 2022

5fc03d2a-3cf8-5607-a6e0-9e1e197140bd